

東文選

一百二十

内閣文庫	
番號	漢 17777
冊數	130 (120)
函號	圖 116 .1



東文選卷之一百二十

碑銘

有明朝鮮國桓王定陵神道碑銘并序

權近

上即位之二年春正月辛未命臣某若曰余以否
德荷天休命肇造邦家 祖宗積德是賴謹已追
謚四代皆上 王爵汝其銘我 先烈考定陵碑
昭示永世臣某承命祗慄不敢以鄙拙辭嘗觀孟
子之言曰五百年必有王者興前朝自始祖王氏
以來垂五百年運祚既衰恭愍絕嗣妖僧辛旽子

禍冒姓竊位荒淫戾虐歲戊辰與其相崔瑩謀興
師妄動將犯天子之境生民之禍靡所紀極維
時我主上殿下爲右軍都統使仗義還師禍乃
知罪遜位子昌越明年天子責以異姓爲王氏
後殿下以侍中任國政與諸將相議立王氏之
裔瑤爲君初自禍時政在權臣鬻官獄濁亂朝
廷攘奪土田籠絡山野紀綱大壞毒痛日甚民胥
怨咨日夕思治及殿下作相革除舊弊更新治
道罷私田以正經界汰冗官以重名器登崇俊良
放竄頑凶奮武威以却邊寇施仁政以厚民業整

頓紀度修明禮樂三韓之民父母愛之瑤乃以昏
迷闇於大體崇信姦回廢黜忠直聽婦寺而亂田
制之正任私昵而紊名器之公政令無常以壞國
法用度無節以傷民財信群小浸潤之譖忘殿下
匡復之功乃與其相鄭夢周常謀陷之夢周陰
嫉其黨之在臺諫者欲加功臣及直言者罪羅織
上書將及殿下禍在不測國人莫不憤怨洪武
二十五年七月十六日左侍中臣裴克廉右侍中
臣趙浚等五十二人知天命之所在察人心之所
歸倡以大義百官父老不謀而同合辭勸進殿

下讓至再三衆志彌固勉即寶位市不易肆兵
不血刃會朝清明民迺大悅即遣知中樞臣趙鼎
奏聞帝乃詔曰三韓之民既尊李氏民無兵禍
人各樂天之樂迺命也未幾中樞使臣趙鼎
繼還又勅國更何號星馳來報即命藝文館學士
臣韓尚質奏請國名賜朝服之號且曰體天牧民
永昌後嗣其獲天人上下之助如此誠所謂應五
百年而興者也臣謹按璿源所自全之望族有司
空諱翰仕新羅娶太宗三十世孫軍尹金殷義之
女生侍中自延侍中生僕射天祥僕射生阿干光

禧阿干生司徒立全司徒生兢休生廉順廉
順生承朔承朔生充慶充慶生景英景英生忠敏
忠敏生關文有生宮進宮進生大將軍勇夫大將
軍生內侍執奏璘執奏娶侍中文克謙之女生將
軍陽茂將軍娶上將軍李公諱康濟之女生知冥
州諱安社後仕元朝爲南京五千戶所達魯花赤
即我殿下皇高祖今封穆王陵號曰德配李氏
千牛長史諱公肅之女今封孝妃陵號曰安皇曾
祖諱行里襲封千戶今封翼王陵號曰智配登州
崔氏今封貞妃陵號曰淑皇祖贈贊成事諱椿今

封度王陵曰義陵配文州朴氏封敬妃陵曰純陵
皇考榮祿大夫判將作監事朔方道萬戶贈門下
侍中諱子春屢立邊功以長萬夫至正庚子四月
甲戌病薨于朔方道年四十六其年八月丙申葬
于咸州之東歸州之原今封桓王陵曰定陵妃崔
氏贈判門下求興伯靖孝公諱閑奇之女封懿妃
陵曰和陵世積勲德肇基王迹善鍾慶發源遠流
光篤生聖哲以建大業天之眷佑有德至矣王凡
三娶懿妃又生一女適三司左使趙仁璧李氏生
男曰元桂仕前朝封完山君卒金氏定安翁主生

男曰和封義安伯 殿下配韓氏贈領門下府事諱
卿之女先薨贈節妃陵曰齊陵生男曰芳雨封鎮
安君曰芳果求安君曰芳毅益安君曰芳幹懷安
君曰太宗靖安君曰芳衍早歿贈元尹女二皆幼
繼室康氏判三司事諱允成之女封顯妃生男曰
芳蕃撫安君曰芳碩幼女適京山李氏齊封興安
君鎮安娶贊成事池齋之女生男曰福根元尹求
安娶贈門下左侍中金天瑞之女益安娶贈門下
贊成事崔仁玃之女生男曰石根元尹懷安娶贈
門下贊成事閔璿之女生男曰孟衆元尹靖安娶

藝文館大學士閔霽之女撫安娶歸義君王某之
女臣竊觀帝王之興其祖宗積累之遠本支蕃衍
之多未有若周家者也爰自后稷歷數十世以至
文武而興王業振振麟趾詵詵螽斯實基蒼姬八
百年之曆亦由先世仁厚之德以致之者也今我
國家自 司空至于 桓王積善悠久而我 殿
下以英明之資神武之略遠紹遺烈光膺大慶以
開億萬世無疆之休金枝之衍既茂且蕃誠與周
家並隆是其積之者以故發之者大樹之者固故
傳之者長遠於戲盛哉臣某拜稽首獻銘銘曰

於皇仙李本固根深粵自 司空世茂德音長發
其祥至于 桓王誕我 明主奄有東方曆數攸
歸不試戎衣與民更始照布德輝 王曰不穀獲
膺天祿寔繇 祖宗毓慶之力迺誓舊章追謚以
王潛德斯至不顯其光振振公姓即篤其慶維本
維支萬世有求瞻彼歸州有峙其丘 王氣鬱葱
無疆維休臣拜稽首我銘不諛刻此貞珉以示後
人

有明謚 康獻朝鮮國太祖至仁啓運聖文
神武大王建元陵神道碑銘 并序

天眷有德以開治運必先現異彰其符命夏有玄
圭之錫周有協卜之夢由漢以降代各有之皆由
天授非出人謀惟我太祖大王之在龍淵也勲
德既隆符命亦著夢有神人執金尺自天降而授
之曰公宜持此正國夏圭周夢可同符矣又有
異人來門獻書云得之智異山巖石之中有木子
更正三韓之語使人出迎則已去矣書雲觀舊藏
秘記有九變震檀之圖建木得子朝鮮即震檀之
說出自數千載之前由今乃驗天之眷佑有德信
有徵哉臣謹按 璿源李氏全州望姓司空諱翰

仕新羅娶宗姓之女六世而至兢休始仕高麗十
三世而至 皇高祖穆王入仕元朝而長千夫四
世襲爵咸能濟美元政既衰 皇考桓王還事高
麗恭愍王至正辛丑紅寇陷王京恭愍南遷遣師
克復我 太祖先登獻捷明年壬寅擊走胡人納哈
出又明年癸卯却逐僞王塔帖木恭愍恃倚益重
累官至將相出入中外樂觀經史亶亶無倦濟時
之量好生之德出於至性恭愍薨異姓竊位權奸
擅國濁亂朝政海寇深入焚掠郡縣洪武庚申我
太祖戰捷雲峯東南以安戊辰侍中崔瑩誅戮權

奸過於慘酷賴我 太祖全活頗多瑩以 太祖
爲侍中仍授右軍都統節鉞逼遣攻遼師次威化
島倡率諸將杖義旋旆師旣登岸大水沒島人皆
神之執退瑩代以名儒李穡爲左侍中方是時也
權奸濁亂狂悖構隙危亡岌岌禍亂莫測非我
太祖轉移之力一國殆矣穡曰今公舉義以尊中
國然非執政親朝則不可尅日如京 太祖爲擇
諸子以今我 主上殿下與穡偕朝 高皇帝嘉
賞而遣已已秋 帝賁異姓爲王 太祖與將相
選立王氏宗親定昌君瑤盡心輔政革私田汰冗

官群情胥悅功高見忌讒慝交構定昌頗惑焉
太祖以盛滿請老而不得謝會因西行遘疾而還
謀者益急我 殿下應機制變群謀瓦解洪武壬
申秋七月十六日 殿下與大臣裴克廉趙浚等
五十二人倡義推戴臣僚父老不謀僉同 太祖
聞變驚起牢讓再三勉登王位不下堂陞而化邦
國非天啓佑有德疇克如茲即遣知中樞院事臣
趙胖奏聞 帝詔曰三韓之民旣尊 李氏民無
兵禍入各樂天之樂乃 帝命也繼又有勅國更
何號即遣藝文館學士臣韓尚質奏請又詔曰維

朝鮮之稱羨可以本其名而祖之體天牧民求昌
後嗣繇我 太祖威聲義烈升聞于上簡在 帝
心故當請命輒蒙俞音豈偶然哉越三年甲戌夏
有構國家者 帝命遣親男入朝 太祖以我
殿下通經達理賢於諸子即遣應命既至敷奏稱
音優禮賜還其冬十一月定都于漢陽營宮室建
宗廟嘗已追尊四代 皇高祖爲穆王配李氏爲
孝妃 皇曾祖爲翼王配崔氏爲貞妃 皇祖爲
度王配朴氏爲敬妃 皇考爲桓王配崔氏爲懿
妃修禮樂而竣祀事定章服而辨等威興學以育

才重祿以勸士辨析詞訟慎簡守令弊政悉革庶
績惟熙海寇來服四境按堵我 太祖巍蕩盛德
真所謂天錫勇智聰明神武雄偉之主也奸臣鄭
道傳以表辭獲譴 帝庭陰謀拒命戊寅秋八月
乘我 太祖不豫之隙欲挾幼孽以肆已志我
殿下炳幾殲除以嫡以長請建 上王爲世子九月
丁丑 太祖以疾未瘳禪于 上王上王未有繼嗣
且謂開國定社咸我 殿下之績乃冊爲世子庚
辰秋七月己巳獻 太祖以啓運神武 太上王
之號冬十有一月癸酉 上王亦以疾禪位于我

殿下遣使請命永樂元年夏四月帝遣都指揮使高得等奉詔印來封我殿下爲國王繼遣翰林待詔王延齡等來賜殿下衮冕九章秩視親王我殿下奉養兩宮誠敬備至永樂戊子五月二十四日壬申太祖晏駕春秋七十四歲在王位七年老不聽政十有一年弓劍忽遺嗚呼痛哉我殿下哀慕罔極諒闇盡禮奉冊寶上太祖至仁啓運聖文神武大王之號以是年九月初九日甲寅葬于城東揚州治之儉巖之山陵曰律元及計聞皇帝震悼罷朝即遣禮部郎中林觀

等賜祭以大牢其文略曰惟王明達好善出於天性敬順天道效義據忠恭謹事大保恤一方之民我皇考深嘉忠誠賜復國號曰朝鮮王功德之著雖古朝鮮之賢王無以過也又賜誥命謚曰康獻又勅殿下賜賻特厚寵異之典備極無憾蓋我太祖畏天之誠殿下繼志之孝前後相承克享天心故於終始之際大獲天人上下之助如此其至嗚呼盛哉云云臣觀歷代受命之君德業之盛符命之神輝映簡冊流光罔極今我朝鮮之誕興也盛德貞符于古有先是宜既得其位又

得其壽峙洪基而流景祚與天地而久長矣臣近
濫承勒碑之命敢不竭精鋪張盛德以垂耿光然
臣筆力鄙拙不足以發揚盛美稱塞明旨謹撰敷
德之在人耳目者敢拜手稽首而獻銘其詞曰
天生斯民立以司牧迺長迺治迺眷有德非天諄
諄有命赫赫禹錫玄圭周夢協卜惟我朝鮮肇基
王迹夢有神人授以金尺符籙前定天心昭晰麗
運既終君昏相酷農月興師大邦構隙我旆義旋
罪人斯得忠誠上聞帝心載懌歷數有歸輿情斯
迫大業既成市肆不易 高皇曰咨惟爾有國民

無兵禍樂天之樂繼賜國號朝鮮是復相地定都
于漢之北虎踞龍蟠王氣攸積宮室崇崇 宗廟
翼翼仁深好生治蔚思輯百度具修萬化斯洽迺
倦于勤傳付 聖嫡迺讓于功惟世惟及明明我
后有幾必燭禍亂再平其慶克篤開國定社咸我
之績大命難辭神器有托祇奉 兩宮虔恭愈恪
孝弟通神 帝眷尤渥遭喪悼悼哀慕踊躋 帝
聞震悼遣使弔哭大牢有祀厚賻有勅美謚褒嘉
恤典備飭自天佑之終始不忒景祚繇繇子孫千
億宗祀悠長與天罔極

有明朝鮮國承仁順聖神懿王后齊陵神道

碑銘

并序

自昔帝王受命而興必賴妃匹之賢侔德毓慶以
求厥緒夏有塗山而啓能繼周有大妣而武丕承
禹文配天之祀繇是有求猗歟盛哉惟我神懿
王后天資淑懿坤德柔貞早嬪龍淵弼成王業篤
生聖哲垂統罔極神功懿範比古無愧獨惜夫大
勲垂集仙遊甚遽太上開國而莫崇其壺儀二
聖承緒而莫致其榮養山陵掩耀霜露增悲嗚呼
勳哉初謚節妃陵号曰齊後加謚神懿王后置

仁昭殿以安真容追崇之典已備舉矣我主上
殿下勳念慈儀求闕孝思莫伸爰命攸司勒銘豐
碑今臣近爲文垂示萬世臣近承命悸恐不敢以
辭謹按后姓韓氏安邊世家皇考諱卿贈忠誠恭
謹積德毓慶輔理功臣壁上三韓三重大匡領門
下府事安川府院君皇祖諱珪仁贈積善毓慶同
德贊化翊祚功臣特進輔國崇祿大夫門下左政
丞判都評議使司事兼判吏曹事安川府院君皇
曾祖諱裕贈純誠積德佐命輔理功臣崇政大夫
門下侍郎贊成事同判都評議使司事兼判戶曹

事安原君皇妣申氏封三韓國大夫人贈秉義毓
德輔祚功臣崇政大夫門下侍郎贊成事同判都
評議使司事判刑曹事元麗之女后生而淑婉聰
慧異常及笄擇配來嬪于我 太上王初爲將相
數十年間出入攻戰靡有寧歲后能竭力營家勉
以成功又性不妬忌禮遇妾侍克有多男教誨以
義今我 主上殿下睿拓英武聖學日進年未及
冠擢第春官當僞辛戊辰之歲侍中崔瑩謀欲猾
夏以我 太上王威望素著授以節鉞俾往攻遼
太上王仗義還師執退崔瑩代以名儒李穡中外

晏然邦國求賴穡告 太上王曰當茲構釁中國
之後非執政者親朝 帝庭則公之忠誠無以白
於天下尅日將行 太上謂穡曰吾與公一時並
使國事誰任我擇一子從公而行猶吾往也乃遣
我 殿下充書狀官特蒙 高皇帝優禮而還已
已秋 帝又降勅責以異姓爲王氏後 太上王
與諸將相議立王氏之裔定昌君瑤爲王先是權
姦擅政效攘矯虔 太上王時爲左相罷私田舉
墜典弊去利興百度俱新功高不賞德大難容讒
邪交構浸潤叵測定昌柔暗依違兩端后乃憂勞

成疾以辛未秋九月十二日薨享年五十五以禮
葬于城南海豐郡治粟村之原我 殿下廬墳欲
終三年明年壬申春 太上西行昇疾而還 殿
下來侍湯藥群邪抵隙謀傾益急我 殿下應機
決策討除溧魁兇徒互解定昌益憚秋七月十六
日與二三大臣倡以大義臣僚父老不謀而同合
辭推戴 太上王迫於群情迺即 王位市肆不
易會朝清明即遣使入奏 帝庭聯承勅報既許
王爵且更國號以復朝鮮之美稱越三年甲戌夏
帝乃遣使令朝親男 太上王以我 殿下通經

達禮最賢諸子命隨來使以行既至 帝與語嘉
之優賞遣歸戊寅秋八月 太上王不豫姦臣鄭
道傳等思擅國柄謀去諸嫡將立幼孽朋家聚黨
禍發斯迫 殿下炳幾先其未發誅除以燿申請
太上以嫡以長迎致 上王冊封世子彝倫既正
宗杜載定九月丁丑 太上以疾未瘳傳位 上
王庚辰正月逆臣朴苞等謀戕同氣誘掖懷安父
子稱兵向闕逆勢甚熾我 殿下率勵將士旋即
平定誅止苞身餘悉不問安置懷安不廢懿親
上 以未有繼嗣且其開國定社咸我 殿下之

續冊爲世子以定國本秋七月己巳奉冊寶加上
太上王啓運神武之號冬十有一月癸酉 上王
亦以疾遜位于我 殿下遣使請命明年辛巳建
文帝遣通政寺丞章謹文淵閣待詔端木禮奉誥
命印章來封我 殿下爲王冬遣鴻臚寺行人藩
文奎來錫冕服秩比親王今 皇帝即位誕告萬
邦 殿下即命左政丞臣河崙入賀登極 帝嘉
忠誠事大賜以誥印遣都指揮高得左通政趙居
任以今年夏四月來仍封爲詔王秋九月又遣翰
林待詔王延齡行人崔榮來錫袞冕九章錦段紗

羅書籍王妃冠袍金段紗羅 太上王金段紗羅
希世寵典先後還至蓋我 殿下功德之盛實天
所啓專付大東以延鴻休宜受 帝眷之隆以膺
天祿之永也肇基之迹雖自 祖宗篤生之慶實
繇 神懿噫嘻盛哉后生六男 上王居二我
主上殿下居五長曰芳兩封鎮安君先卒次三芳
毅封益安大君次四芳幹懷安大君次六芳衍登
科不祿二女長慶慎宮主適贊成事李佇次慶善
宮主適清原君沈淙 上王配金氏今封王大妃
贈左侍中天瑞之女我 殿下配靜妃驪興府院

君領藝文春秋館事閔霽之女男長元子禔次三
男皆幼女長貞順宮主適清平君李伯剛次慶貞
宮主適平寧君趙大臨餘皆幼鎮安娶贊成事池
齋之女生男曰福根奉寧君女適少尹李叔畝益
安娶贈贊成事崔仁玗之女生男曰石根元尹女
適僉摠制金閑懷安娶贈贊成事閔璿之女生男
曰孟宗義寧君女適宗簿今趙慎言餘皆幼臣近
嘗觀三代聖王后妃之德莫盛塗妣載在詩書千
古炳耀神懿之德誠可儷美第以臣近學識膚
淺筆力鄙拙雖極形容盛德如繪天地曷能髣髴

其萬一哉敢稽周雅大明思齊之義謹述銘詞拜
手誓首以獻其詞曰

上帝赫赫啓佑有德匪伊私之爲民之極其啓維
何迺生柔嘉來配于德允宜室家載震載育厥靈
是赫篤生聖哲天人攸屬扶翊聖父誕作民
主躬朝帝庭保我邦土孽芽之萌炳幾維明廓
爾汎掃宗社載寧功成克讓以尊嫡長彝倫旣
正基勢益壯迺遭墻闕不忍致辟俾獲保全友愛
彌篤維德之隆維功之崇宜紆帝眷錫命稠重
明明帝誥煌煌金寶我龍受之萬世永保粵維

王迹 祖宗攸積誕我 聖神繫繇 后德臣拜
誓首獻辭不苟萬世昭垂天地永久

有明朝鮮國謚文簡公安公墓碑銘并序

公諱宗源字嗣清姓安氏順興府人考諱軸號謹齋先生中皇元制科相高麗爲都僉議贊成事卒謚文貞嘗存撫關東著瓦注集行于世祖諱碩及弟曾祖諱希諤本府戶長累積不施以遺後慶文貞力學起家位至宰相娶甘泉郡夫人文氏檢校軍器監龜之女也以泰定乙丑五月癸酉生公公生而聰慧稍長知讀書不事嬉戲舉止異群兒識

者知其必貴至正辛巳公年十七金左使光載試成均李侍中昂鄭贊成乙輔掌禮園公一舉聯中其選壬午初權典校校勘歷三年遂爲真乙酉選入藝文春秋館爲二檢閱舊居是館者率以疎放相尚公繩以禮法館中肅然丙戌再加修撰供奉秩滿當去同僚沈東老年高位下公讓之使得先遷文貞聞之喜曰讓德之先也我讓於人人誰捨我吾家有人殆益昌乎後一年乃拜三司都事自是歲遷副使有備倉丞司僕令供造所居稱職譽聞弥播歲辛卯恭愍王立除都官佐郎壬辰轉軍

簿癸巳擢典法正郎時田民刑訟皆聚典法公裁
決平允人稱其明甲午秋公年三十選爲慶尚道
按廉陞辭之日王問理民之術公先諸道按廉數
陳詳切王稱善治果有聲其冬遷版圖乙未以軍
簿正郎出知呂興丁母憂不之任丙申夏王誅元
后奇氏之族倚勢不法者起公爲殿中侍御史以
振憲綱丁酉遷起居郎知製教上封事改禮部郎
中戊戌移于吏部時罷政房以銓選歸吏兵部公
掌其務不阿權貴同列憚服庚子階朝散大夫侍
御史辛丑秋出按揚廣其冬紅賊犯松京恭愍王

播越而南公先往忠州以備供御時王左右有以
事舍公者譖于王曰按廉宗源到忠州已踰嶺而
遁矣王信之遣中使執以來使者至忠州見公在
館營辦供具知其被誣執與俱來以其事聞王釋
不問左右復譖遂械繫之宰相以非罪白王乃貶
知清風郡事踰年而罷其民至今思之癸卯爲都
官惣郎甲辰遷典法及辛旽擅權時號領相士大
夫爭趨附之有執政者與公言某等薦公於領相
諫官可得宜速往謁公辭曰我本踈懶趨勢非吾
所能也執政慙之反譖公出爲江陵府使有惠政

未久而代閑居七八年屏跡不出詩書自娛洪武
辛亥眈伏誅壬子二月復爲司憲侍史冬加典校
令癸丑遷右司議大夫知製教直寶文充春秋甲
寅改左司議乙卯洊歷成均大司成判宗簿寺事
加通憲右常侍丙辰春拜大司憲階奉翊秋入密
直爲提學仍兼大司憲俄又改副使丁巳加同知
戊午移簽書己未階加匡靖判崇敬府事未幾罷
封重大匡興寧君庚申以商議政堂復兼大司憲
辛酉加純誠補祚功臣之號門下評理大司憲仍
故壬戌春又封興寧君加功臣號純誠翊戴輔理

其夏知貢舉取柳亮等三十三人時稱得士亮今
爲中樞餘皆顯丙寅拜政堂文學大進賢知春秋
丁卯罷復封君戊辰正月侍中崔瑩得政誅權臣
貪汚者以公清謹除門下贊成事判典工爲提調
銓選事公辭不克六月改爲商議八月判厚德府
事仍掌銓選十月以藝文館大提學兼判尚瑞司
事兼判尚瑞即提調銓選之職也己巳六月加重
大匡門下贊成事判版圖世稱二相奉使如上國
賀 聖節冬還恭讓君立復拜大藝文監春秋庚
午拜判三司事大右文領書雲觀事辛未進封三

重大匡興寧府院君每自以盛滿辭壬申七月今
我主上即位以公爲國初元老清德重望足以
坐鎮雅俗授特進輔國崇祿大夫領三司事集賢
殿大學士癸酉判門下府事階勳館職如故甲戌
公年已七十矣二月復奉使如上國至連山站遼
東都司稱有朝旨阻當而還三月二十四日以疾
卒于第訃聞上悼甚罷朝命遣門下左侍中平
壤伯趙浚賚教書致奠于殯賻贈有加奉常謚文
簡有司具儀衛五月庚申葬于臨津縣瑞國洞公
天資簡重風神清朗持身以慎當官以勤居家不

言利臨事安詳未嘗有疾言遽色待人接物位尊
而益謙又不言人過失有善則稱之不已每誡子
弟自不妄語始長子仲溫嘗尹安東親書訓誡之
辭數十條以與之甚詳且切舉可爲法作亭於宅
之後岡扁以雙清因爲自號客至必置酒不務豐
侈不喜琴瑟惟以禮意款洽再掌銓選不用私謁
出入臺諫務從大體不事瑣細歷相累朝不爲子
弟求恩澤謹守成憲不喜紛更議論寬厚有宰相
體趙密直云侂後公二十餘年乃任江陵知父老
思公不忘爲構生祠堂畫公像以掛之及公之沒

遠近聞者莫不相吊以悲公之終始可謂克全矣
公娶奉翊大夫右常侍金輝南之女生四男一女
長即仲溫奉翊大夫密直提學集賢館提學上護
軍娶版圖判書金安理之女無子先公沒次日景
良今爲資憲大夫西北面都巡問使同中樞院事
嘗以密直觀察楊廣有聲績上重西北鄙欲付
治材而難其人廟堂舉公故特起復有是命次日
景恭推忠翊戴開國功臣資憲大夫興寧君亦以
大司憲觀察全羅是三子皆登科封母金氏爲慶
寧宅主歲受賜廩今以興寧佐命之功仍其封爵

秩祿不替次日景儉嘉善大夫工曹典書敷歷臺
諫按察州郡以材稱諸子克承家訓廉謹守禮皆
有父風女適某官柳厚亦端人也稱其爲公家之
甥孫男女若干人都巡問使娶帶方君梁天龍之
女無子二室鄭氏生男曰民秀興寧君娶政堂文
學鄭思道之女生一男曰純左拾遺工曹娶清城
君韓脩之女生一男五女男曰民同倉庫都監判
官女適禮賓寺丞金孟誠次適生負李允商次適
奉禮郎金闡次適郎將李士欽餘幼柳密直生二
男長曰沂左正言次日漢東部令曾孫男女若干

入拾遺娶政堂文學鄭公權之女生二男二女皆
幼長曰崇直次曰崇善柳正言娶密直李種德之
女生二男長曰方善次曰方敬再娶判典校寺事
方旬之女生一男曰方謹東部令娶大司憲朴經
之女生一男金寺丞生二女皆幼既葬之明年夏
興寧君以大夫人之命來語於近曰吾先公德行
播在人耳目不可諛也惟圖不朽將銘石是托子
父與吾兒輩遊學同業仕同時又嘗知吾先公事
况今在藝文春秋館以任編摩之職撰銘公墓將
子無讓近不敢以鄙拙辭銘曰

率律高山子與是環淑氣攸鍾迺降厥神迺生碩
人溫溫其恭位冠蟬聯壽享稀年善始令終有子
有孫簪履盈門教誨之功瑞國之原夏屋之墳惟
公玄宮伐石作碑爰刻我辭永示無窮

有明朝鮮國追贈推忠直節守文秉義輔祚
功臣特進輔國崇祿大夫門下右政丞判都
評議使司事兵曹事修文殿大學士領藝文
春秋館事西原伯謚文簡公行光祿大夫刑
部尚書集賢殿學士李公神道碑銘 并序

永樂元年秋八月領司平府事西原府院君李公

以先君墓碑屬予而言曰吾先君子種德不食以
遺我後人仍父子荷寵榮位崇祿厚追爵先世焚
且吾不幸幼孤三兄亦皆先逝惟先人德行莫得
而詳堙晦不傳是懼爾子其爲考世系歷官而爲
之銘予不獲辭謹按李氏清州之籍爲國望族最
顯且久高麗太祖之肇興也有諱能希克左右有
功封爲國公圖形壁上至六世孫諱公升操行修
潔相仁王毅王嘗奉使于金不受一錢清德益彰
毅王於秋夕翫月天朗無雲嘆賞久之乃曰今宵

明月猶公升宵中無一點塵埃卒謚文貞上下數
百年間子孫濟美世德相承逮文簡公益自飭理
以貽後慶司平公與其子上黨君協心戮力相我
朝鮮再有定社佐命之功同嘽勲盟並崇台鼎上
黨與弟清平君皆尚公主積善之慶益大以昌吁
其盛哉文簡公諱挺古名春吉泰定乙丑公年二
十九始以門陰拜八關寶判官明年冬中丙科第
二人及第繇奉車直長歷移典法佐郎致和元年
以版圖正郎出知草溪郡事有惠政後拜監察掌
今典法摠郎察訪慶尚道閑居十載優游自逸至

正癸巳復拜中正成均祭酒加奉順判典校寺事
進賢館提學甲午正順判通禮門事乙未判尉衛
寺事實文閣提學階加奉翊儀遷右常侍丁酉改
授榮祿大夫右散騎常侍集賢殿學士戊戌光祿
大夫刑部尚書館職如古此其歷仕也公嘗以清
儉自律循蹈禮則不隨俗俯仰世俗服其正直退
居鎮州之常山不求官達恭愍王在潛邸父聞其
賢及即位召至于京嘉其清慎提調內佛堂事親
書文貞公操履大節及毅王翫月嘆賞之語繼以
公志慕祖先亦薄世味之事累百餘言以賜之方

將大用遽歸舊隱辛丑六月十九日以疾卒春秋
六十三葬于常山之南麓父諱季城重大匡琅城
君諡正憲祖諱昌祐版圖惣郎贈密直司使曾祖
諱粧殿中監贈知門下省事即文貞公子叅知政
事諱椿老之子也外祖諡文慎公金賸某州人夫
人溟州金氏某官繼貂之女享年七十後公十五
年以洪武乙卯四月二十一日卒葬于公塋之傍
又其後二十餘年以司平之功贈公門下右政丞
西原伯封夫人卞韓國推恩典也有男四人女二
人男長曰由信登壬午科以刑部郎中出按慶尚

道先公歿次曰居仁檢校左政丞卒謚恭節次曰
居義工曹典書早沒次曰居易門下左政丞今爲
領司平府事西原府院君女長適檢校門下侍中
李崇次適恭安府尹閔慶生孫男女若干人郎中
娶尚書洪承祚之女生男長曰德閔護軍次曰富
閔殿中卿女長適政堂文學兼司憲府大司憲李
至次適大護軍金紹恭節娶都僉議政丞曹益清
之女生男二人皆幼後娶漢山君李光雨之女生
男曰宏道司水監丞女長適判事朴專誼次適軍
資注夫梁仲寬次適工曹議郎盧敬次適都染署

丞沈聰工曹娶護軍金仁晦之女生男曰崑崙司
憲監察領司平娶刑部尚書崔堧之女生男曰佇
議政府贊成事上黨君尚 太上王女慶慎宮主
次曰伯寬上護軍次曰伯信大護軍次曰伯剛清
平君尚今上女貞慎宮主次曰儂幼女長適典農
正辛中善次適宗簿副今慶智外孫男女若干人
李侍中生男曰岷光州牧使次曰嶙司宰少監次
曰峙延安府使女長適判典農寺事崔安濬次適
判漢城府事崔有慶次適平壤府院君趙浚次適
奉禮郎金祉閔恭安生男曰諫直藝文館女長適

知谷州事洪濟次適平原君趙璞曾孫男女若干
入平寧君大臨尚今上女慶貞宮主政丞趙浚之
子也餘皆幼自古勲閹之家不數世後便爲寒門
蓋由祖先積累雖勤爲子孫者率多驕侈持守夫
謹故耳今公先世德厚流光發達旣盛司平父子
咸能敬慎益勵志節不挾不矜樂善無倦是其持
守愈謹克振前光流慶後胤蓋未艾也是宜爲銘
銘曰

膺膺西原孰濬其源國公肇緒克固其根其根旣
固枝葉是繁烈烈文貞操履之清曾中無累秋月

之明顯允刑部維德之行身以禮持不與俗隨清
儉彌篤厚積厥基宜卿宜相訖莫以施遺慶于後
以垂其裕迺啓司平旣峻且武忠在社稷功藏盟
府父子再嘒同獎王業兄弟並美王姬是室赫赫
寵光雖古罕匹咸能守法愈謹秉節福未有艾增
光前烈繩繩來裔引之無替刻辭于碑昭示來世

東文選卷一百二十五

東文選一百二十五

[Faded vertical text in columns]



